



*Jumat, 21 Juni 2024*

**Ogen: Epesus 5:19-20**



**Arih-Arih**



“Arih-arit muat si mehuli” jadi palsapah ngeluh siniajarkan orang tuanta si ndube. Kai pe si jadi adi arihken erlayas nge kari dungna. Erdandanken si e, arih-arit e nggo jadi bagin si la terpesirang i bas kegehenta. Si enda teridah arah teptep pendahin si nuate ilakoken. Umpamana sope benaken dahin si mbelin; kerja peradaten, e maka ilakoken arih-arit subuk bas jabu bage pe sangkep geluh. La cukup sekali ngenca ilakoken tapi piga-piga kali guna mbages isekseki dinging reh teremna si ngukurisa seh ulina, reh jorena kari ulih perarihen e. Ulih perarihen e mpetetap ukur dinging mereken gegeh kap sabap enggo erbage sisi kegeluhen si ngukurisa.

Bas gerejanta pe arih-arit enda mekatep kal silakoken. Gereja ingan arih-arit. Kerina si nuate ilakoken iarihken me lebe. Bage pe kerina si enggo ilakoken, ievaluasi (icakapken ka mulihi) guna ngidah uga ngaruhna nandangi kiniteken perpulungen. Terkusus wari enda pulung me Badan Pengurus Morai Klasis ras Badan Pengurus Pusat Moria rikut ras pengurus paduan suara, ras pengurus KWK GBKP lako ercakup, arih-arit, ngukuri simehulina kerna dahin-dahin Moria se-GBKP enda. Erbage kuta, erbage cara perukuren, erbage pengejapen, ibas kita kerina tapi ipersada i bas persidangan e.

Paulus bas suratna man perpulungen Epesus, ngajuk segelah perpulungen e ercakup-cakap make masmur, pujin alu ukur pusuh ngataken bujur. Ngataken bujur katawari paksa pe i bas gelar Tuhan. Tentuna enda mabai maka arih-arit sinilakoken e jadi pujinta man Dibata. I bas ercakup-cakap silakoken e terpujilah Tuhan, janah ola min sempat i bas ercakup-cakap e erbahanca ceda pusuh Tuhan, erkiteken lit i je mpelebe sura-sura ukurna saja. Teptep kata sinibelasken i bas runggu, min ncidahken kinitekenta. Tujunta e me pehuliken Moria belang-belang GBKP enda.



